

von Wulf Wager

Dackelhafte Sprinterfahrer



I ben ja eigentlich en richtig gmiatlicher Typ. 's oinzige, wo i mi wirklich aufreg, isch beim Autofahra. Entweder, weil mei Frau drneba sitzt und dauernd besser woiß, wia mr fährt, oder wenn en Sprinter (oder sonstige Kleintransporter) vor mir auf dr linka Spurfahrat, obwohl die rechte Spur frei isch!!!! Do kennt i mi aufrega wia d' Sau. Wenn i no rechts vorbei fahr on in des

Führerhaus neiguck, dann hockt do moischens so en migrantischer Hintergrundschwob mit ra Basebolkapp ond fette Goldketta ond schreibt an seim Handy a SMS oder er telefoniert. Dass i aber nix sieh, wenn i hender dem Daggl herfahr, des intressiert koin. Do kennt i mit Eisabahschwella neischlaga. Emmer bloß links. Neulich ben i noch Müncha gfahra. Durchgehend auf dr rechta Spur. Während denne zwoi Stond han i bestimmt 24 Sprinterfahrer rechts überholt, weil die Granataseggel äwwl bloß links fahrat.

Wo i von Müncha wieder zrück gfahra ben, es war scho spät in dr Nacht, isch mir uf oimol a Polizeiauto henderhergfahra ond hot mi o'ghalta. I ben vollständig vorschriftsmäßig gfahra, war miad ond grätig ond han 's Fenschter ronterglassa ond zu dene zwoi Polizishta gsait: "Wia hätt i jetzt eurer Ansicht noch fahra miassa, dass ihr mit net ahaltat?" Des gäng mi garnix a, des miaßt i scho ohne überlassa, hot dr oi gsait. Dodruf i: "Send ihr schlecht druf, weil euch d' Mamme heut mol wieder gleich ozoga hot?" Des hot dene net arg gfalla ond i han drei Stond uf am Revier zuabrocht, bis i erkennungsdienstlich erfasst. Morgens om viere han endlich hoim kenna. Hätt i besser mei Gosch ghalta. Ond des bloß, weil i emmer no glada war wega dene dagglhafte Sprinterfahrer ...

Bis näggschd Woch´

Ihr

Wulf Wager

Alle Kolumnen zum Nachlesen: www.woascht.de